

# Odluka o izmjeni Odluke kojom se imenovao Privremeni upravnik Hercegovačke banke kako bi se produžio rok potpune ili djelimične blokade depozita i investicija od strane javnosti u Hercegovačku banku

**Koristeći se** ovlaštenjima koja su mi data članom V Aneksa 10 (Sporazum o civilnoj implementaciji Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja spomenutog Sporazuma o civilnoj implementaciji Mirovnog ugovora; i posebno uzevši u obzir član II. 1. (d) gore navedenog Sporazuma, prema kojem Visoki predstavnik “pruža pomoć, kada to ocijeni neophodnim, u iznalaženju rješenja za sve probleme koji se pojave u vezi sa civilnom implementacijom”;

**Pozivajući se** na stav XI.2 Zaključaka Vijeća za implementaciju mira koje se sastalo u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u pogledu tumačenja Sporazuma o civilnoj implementaciji Mirovnog ugovora kako bi pomogao u iznalaženju rješenja za probleme, kako je prethodno rečeno, “donošenjem obavezujućih odluka, kada to bude smatrao neophodnim,” u vezi sa određenim pitanjima, uključujući (u skladu sa tačkom (c) ovog stava) i “mjere u svrhu osiguranja implementacije

Mirovnog sporazuma na čitavoj teritoriji Bosne i Hercegovine i njenih entiteta”;

**Pozivajući se** na član 11. moje Odluke od 6. aprila 2001. god. o imenovanju Privremenog upravnika Hercegovačke banke (“Službene novine Federacije Bosne i Hercegovine”, br. 12/01) kojim se daje ovlaštenje Privremenom upravniku da u bilo koje vrijeme proglasi potpunu ili djelimičnu blokadu svih ili dijela depozita i investicija od strane javnosti u Hercegovačku banku na rok od najviše godinu dana;

**Konstatujući** da je Privremeni upravnik blokirao sve depozite i investicije od strane javnosti u Hercegovačku banku od dana svog imenovanja, na osnovu odredaba navedenog člana;

**Smatrajući** da bi deblokiranje depozita i investicija nakon isteka roka od godinu dana moglo ugroziti dosadašnje rezultate rada Privremenog upravnika Hercegovačke banke;

Na osnovu svega gore navedenog, donosim slijedeću

### **ODLUKU**

**o izmjeni gore navedene Odluke kojom sam imenovao Privremenog upravnika Hercegovačke banke kako bi se produžio rok potpune ili djelimične blokade depozita i investicija od strane javnosti u Hercegovačku banku**

1. Privremenom upravniku se daje ovlaštenje da proglasi potpunu ili djelimičnu blokadu svih ili dijela depozita i investicija od strane javnosti u Hercegovačku banku i nakon isteka maksimalnog roka od jedne godine predviđenog u članu 11. navedene Odluke o imenovanju Privremenog upravnika, na dalji rok ili rokove koji Privremeni upravnik ocijeni potrebnim kako bi u potpunosti izvršio svoje poslove i zadatke.

2. Moja Odluka od 6. aprila 2001. godine u svim drugim aspektima ostaje nepromijenjena.

3. Izmjena iz ove Odluke stupiće na snagu na osnovu ovlaštenja koja su mi data u skladu sa Općim okvirnim sporazumom za mir u Bosni i Hercegovini na potpuno isti način kao da je ta izmjena sadržana u navedenoj Odluci od 6. aprila 2001. god.

4. Ova Odluka stupa na snagu odmah i odmah će se objaviti u "Službenim novinama Federacije Bosne i Hercegovine".

Sarajevo, 04. april 2002. god.

Wolfgang Petritsch

Visoki predstavnik